

國醫學院講義教材

——婦科合訂冊——

(卷 參)



新國醫講義教材

婦科

產後氣喘六十六

婦人產後氣喘，最是大危之證，苟不急治，立刻死亡，人只知是氣血之虛也，誰知是氣血兩脫乎，夫既氣血兩脫，人將立死，又何能作喘，然此血將脫而氣猶未脫也，血將脫而氣欲脫之，而反上喘，如人救溺，援之而力不勝，又不肯自安於不救，乃號召同志以求助，故呼聲而喘作，其證雖危，而可救處正在能作喘也，蓋肺主氣，喘則肺氣似盛而實衰，當是之時，血將脫而萬難驟生，望肺氣之相救甚急，若赤子之望慈母，然而肺因血失，止存幾微之氣，自顧尚且不暇，又何能提挈乎血氣，不與血俱脫者幾希矣，是救血必須補氣也，方用救脫活母湯，人參五錢當歸一兩酒洗熟地一兩九蒸枸杞子五錢山萸五錢蒸去核麥冬一兩去心阿膠二錢蛤粉炒肉桂一錢去粗皮研黑芥穗二錢水煎服，一劑而喘輕，二劑而喘滅，三劑而喘定，四劑而全愈矣，此方用人參以接續元陽，然徒補其氣而不補其血，則陽燥而狂，雖回生於一時，亦旋得旋失之道，即補血而不補其肝腎之精，則本原不固，陽氣又安得而續乎，所以又用熟地山萸枸杞之類，以大補其肝腎之精



而後大益其肺氣，則肺氣健旺，升提有力矣，特慮新產之後，用補陰之藥，膩滯不行，又加肉桂以補命門之火，使火氣有根助人參以生氣，且能運化地黃之類，以化精生血，若過於助陽，萬一血隨陽動，瘀而上行，亦非保全之策，更加荊芥以引血歸經，則肺氣安而喘速定，治幾其神乎。

產後惡寒身顫六十七

婦人產後惡寒惡心，身體顫發熱作渴，人以爲產後傷寒也，誰知是氣血兩虛，正不敵邪而然乎，大凡人之氣不虛，則邪斷難入，產婦失血既多，則氣必大虛，氣虛則皮毛無衛邪原易入，正不必戶外之風來襲體也，卽一舉一動，風卽可乘虛而入，然產後之婦，風易入而亦易出，凡有外邪之感，俱不必祛風，況產婦之惡寒者，寒由內生也，發熱者，熱由內弱也，身顫者，亦由氣虛也，治其內寒，而外寒自散，治其內弱，而外熱自解，壯其元陽，而身顫自除，方用十全大補湯，人參三錢白朮三錢土炒茯苓三錢去皮甘草一錢炙川芎一錢酒洗當歸三錢酒洗熟地五錢九蒸白芍二錢酒炒黃芪一兩生用肉桂一錢去粗皮研水煎服，一劑而諸病悉愈，此方但補氣與血之虛，而不去散風與邪之實，正以正足而邪自除也，况原無邪氣乎，所以奏功之捷也。

產後惡心嘔吐六十八

婦人產後惡心欲嘔，時而作吐，人皆曰胃氣之寒也，誰知是腎氣之寒乎，夫胃爲腎之關胃之氣寒，則胃氣不能行於腎之中，腎之氣寒，則腎氣亦不能行於胃之內，是腎與胃，不可分而兩之也，惟是產後失血過多，必致腎水乾涸，腎水涸應腎火上炎，當不至胃有寒冷之虞，何故腎寒而胃亦寒乎，蓋新產之餘，水乃遽然涸去，虛火尙不能生，火既不生，而寒之象自現，治法宜補其腎中之火，然火無水濟，則火在水上，未必不成火動陰虛之證，必須于水中補火，腎中溫胃，而後腎無太熱之患，胃有既濟之歡也，方用溫腎止之湯，熟地五錢九蒸巴戟一兩鹽水炒人參三錢白朮一兩土炒山萸五錢蒸去核炮薑一錢茯苓二錢去皮白蔻一粒研橘紅五分薑汁洗水煎服，一劑而嘔吐止，二劑而不再發，四劑而全愈矣，此方補腎之藥，多於治胃之品，然而治腎仍是治胃也，所以腎氣升騰，而胃寒自解，不必用大熱之劑，溫胃而祛寒也。

產後血崩六十九

少婦產後半月，血崩昏暈，如中惡邪，人皆曰惡血沖心也，誰知是不慎房幃之過乎，夫產後業踰半月，氣血雖不比初產之二三日，而氣血初生，尙未全復，卽血

路已淨，而胞胎之損傷未痊，斷不可輕於一試，以重傷其門戶，無奈少嬌之婦，氣血初復，不知慎養，慾心大動，貪合圖歡，以致血崩昏暈，如中惡邪，是心腎兩傷，不特胞胎門戶已也，明明是既犯色戒，又加酣戰，以致大洩其精，精洩而神亦隨之，而欲脫此等之證，乃自作之孽，多不可活，然於不可活之中，而思一急救之法，舍大補其氣與血，別無良法也，方用救敗求生湯，人參二兩當歸二兩酒洗白朮二兩上炒九蒸熟地一兩山萸五錢蒸山藥五錢炒棗仁五錢生用附子一分或一錢白製水煎服，一劑而神定，二劑而暈止，三劑而血亦止矣，倘一服見效，連服三四劑，減去一半，再服十劑，可慶更生，此方補氣以回元陽，於無何有之鄉，陽回而氣回，自可攝血以歸神，生精而續命矣。

產後手傷胞胎淋漓不止七十

婦人有生產之時，被穩婆手入產門，損傷胎胞，因而淋漓不止，欲少忍須臾而不能，人謂胞破不能再補也，孰知不然，夫破傷皮膚，尚可完補，豈破在腹內者，獨不可治療，或謂破在外，可用藥外治以生皮膚，破在內，雖有靈膏，無可救補耳，然破之在內者，外治雖無可施力，安必內治不可奏功乎，試思瘡瘍之毒，大有缺陷，尚可服藥以生肌肉，此不過收生不謹，小有所損，並無惡毒，何難補其

陷也，方用完胞飲，人參一兩白朮一兩土炒茯苓三錢去皮生黃耆五錢當歸一兩酒炒川芎五錢紅花一錢桃仁十粒炮炒研益母草三錢白朮末一錢用豬羊胞一個，先煎湯，後煎藥，飢服十劑全愈，夫胞損宜用補胞之藥，何以反用補氣血之藥也，蓋生產本不可手探試，而穩婆竟以手探胞胎，以致傷損，則難產必矣，難產者，因氣血之虛也，產後大傷氣血，是虛而又虛矣，因虛而虛，復因損而更虛，若不補其氣與血，而胞胎之破，何以奏功乎，今之大補其氣血者，不啻飢而與之食，渴而與之飲也，則精神大長，氣血再造，而胞胎何難補完乎，所以旬日之內便成功也。

產後四肢浮腫七十一

產後四肢浮腫，寒熱往來，氣喘咳嗽，胸膈不利，口吐酸水，兩脇疼痛，人皆曰敗血流於經絡，滲於四肢，以致氣逆也，誰知是肝腎兩虛，陰不得出之陽乎，夫產後之婦，氣血大虧，自然腎水不足，腎火沸騰，然水不足，則不能養肝，而肝木大燥，木中乏津，大燥火發，腎火有黨，子母兩焚，火焰直沖而上侵肺金，金受火刑，力難制肝，而咳嗽喘滿之病生焉，肝火既旺而下剋脾土，土受木刑，力

難制水，而四肢浮腫之病出焉，然而肝木之火旺，乃假象而非真旺也，假旺之氣，若盛而實不足，故時而熱，時而寒，往來無定，乃隨氣之盛衰以爲寒熱，而寒非真，寒熱亦非真熱，是以氣逆於胸膈之間而不舒耳，兩脇者，肝之部位也，酸者，肝之氣味也，吐酸脇疼痛，皆肝虛而腎不能榮之象也，治法宜補血以養肝，補精以生血，精血足而氣自順，而寒熱咳嗽浮腫之病悉退矣，方用轉氣湯，人參三錢 茯苓三錢 去皮白朮三錢 土炒當歸五錢 酒洗白芍五錢 酒炒熟地一兩 九蒸山萸三錢 蒸山藥五錢 炒芡實三錢 炒破故紙一錢 鹽水炒柴胡五分 水煎服，三劑效，十劑痊，此方皆是補血補精之品，何以名爲轉氣耶，不知氣逆由於氣虛，乃是肝腎之氣虛也，補肝腎之精血，卽所以補肝腎之氣也，蓋虛則逆，旺則順，是補卽轉也，氣轉而各證盡愈，陰出之陽，則陰陽無扞格之虞矣。

產後肉線出七十二

婦人有產後水道中出肉線一條，長二三寸，動之則疼痛欲絕，人以爲胞胎之下墜也，誰知是帶脈之虛脫乎，夫帶脈束於任督之間，任脈前而督脈後，二脈有力，則帶脈堅牢，二脈無力，則帶脈崩墜，產後亡血過多，無血以養任督，而帶脈崩墜，力難升舉，故隨溺而隨下也，帶脈下垂，每每作痛於腰臍之間，況下墜者而

出於產門之外，其失於關鍵也更甚，安得不疼痛欲絕乎，方用兩收湯，人參一兩白朮二兩土炒川芎三錢酒洗九蒸熟地二兩山藥一兩炒山黃四錢蒸芡實五錢炒扁豆五錢炒巴戟三錢鹽水浸杜仲五錢炒黑白果十枚搗碎水煎服，一劑而收半，二劑而全收矣，此方補任督而仍補腰臍者，蓋以任督連於腰臍也，補任督而不補腰臍，則任督無助，而帶脈何以升舉，惟兩補之，則任督得腰臍之助，帶脈亦得任督之助而收矣。

產後肝痿七十三

婦人產後，陰戶中垂下一物，其形如帕，或有角，或二歧，人以爲產類也，誰知是肝痿之故乎，夫產後何以成肝痿也，蓋因產前勞役過傷，又觸動怪怒，以致肝不藏血，血亡過多，故肝之脂膜，隨血崩墜，其形似子宮而實非子宮也，若是子宮之下墜，狀如茄子，只到產門，而不能越出於產門之外，惟肝之脂膜，往往出產門外者至六七寸許，且有粘席乾落，一片如手掌大者，如是子宮墜落，人立死矣，又安得而復生乎，治法宜大補其氣與血，而少加升提之品，則肝氣旺而易生，肝血旺而易養，肝得生養之力，而脂膜自收，方用收膜湯，生黃耆一兩人參五錢白朮五錢土炒白芍五錢酒炒焦當歸三錢酒洗升麻一錢水煎服，一劑即收矣，或疑

產後禁用白芍，恐伐生氣之原，何以頻用之而奏功也，是未讀仲景之書者，嗟乎，白芍之在產後不可頻用者，恐其收斂乎瘀也，而謂伐生氣之原則誤矣，況病之在肝者，尤不可以不用，且用之於大補氣血之中，在芍藥亦忘其爲酸收矣，又何能少有作祟者乎，矧脂膜下墜，正藉酸收之力，助升麻以提補氣血，所以奏功之捷也。

產後氣血虛乳汁不下七十四

婦人產後絕無點滴之乳，人以爲乳管之閉也，誰知是氣與血之兩涸乎，夫乳乃氣血之所化而成也，無血故不能生乳汁，無氣亦不能生乳汁，然二者之中，血之化乳汁，又不若氣之所化爲尤速，所產之婦，血已大虧，血本自顧不暇，又何能以化乳，乳全賴氣之力以行血而化之也，今產後數日而乳不下點滴之汁，其血少氣衰可知，氣旺則乳汁旺，氣衰則乳汁衰，氣涸則乳汁亦涸，必然之勢也，世人不知大補氣血之妙，而一味通乳，豈知無氣則乳無化，無血則乳無以生，不幾向飢人而乞食，貧人而索金乎，治法宜補氣以生血，而乳汁自下，不必利竅以通之也，方名通乳丹，人參一兩生黃耆一兩當歸二兩酒洗麥冬五錢去心木通三分桔梗三七孔猪蹄二個去爪殼水煎服，二劑而乳如泉湧矣，此方專補氣血以生乳汁，正以

乳生於氣血也，產後氣血涸而無乳，非乳管之閉而無乳者可比，不去通乳而名通乳丹，亦因服之乳通而名之，今不通乳而乳生，即名生乳丹亦可。

產後鬱結乳汁不通七十五

少壯之婦，於生產之後，或聞丈夫之嫌，或聽翁姑諍，遂致兩乳脹滿疼痛，乳汁不通，人以爲陽明之火熱也，誰知是肝氣之鬱結乎，夫陽明屬胃，乃多氣多血之府也，乳汁之化，原屬陽明，然陽明屬土，壯婦產後，雖云亡血，而陽明之氣，實未盡衰，必得肝木之氣以相通，始能化成乳汁，未可全責之陽明也，蓋乳汁之化，全在氣而不在血，今產後數日，宜其有乳，而兩脹滿作痛，是欲化乳而不可得，非氣鬱而何，明明是羞憤成鬱，土木相結，又安能化乳而成汁也，治法宜大舒其肝木之氣，而陽明之氣血自通，而乳亦通矣，不必專去通乳也，方名通肝生化湯，白芍五錢醋炒當歸五錢酒洗白朮五錢土炒熟地三分甘草三分麥冬五錢去心通草一錢柴胡一錢遠志一錢水煎服，一劑即通，不必再服也。

產後總論

凡病起於血氣之衰，脾胃之虛，而產後尤甚，是以丹溪先生論產後必大補氣血爲先，雖有他證，以末治之，斯言盡治產之大旨，若能擴充立方，則治產可無過矣。

夫產後憂驚勞倦，氣血暴虛，諸證乘虛易入，如有氣母專耗散，有食母專消導，熱不可用芩連，寒不可用桂附，寒則血塊停滯，熱則新血崩流，至若中虛外感，見三陽表證之多，似可汗也，在產後而用麻黃，則重竭其陽，見三陰裏證之多，似可下也，在產後而用承氣，則重亡陰血，耳聾脇痛，乃腎虛惡露之停，忌用柴胡，謔語出汗，乃元弱似邪之證，非同胃實，厥由陽氣之衰，無分寒熱，非大補不能回陽而起弱，瘧因陰血之虧，不論剛柔，非滋榮不能舒筋而活絡，乍寒乍熱，發作無期，證似瘧也，若以瘧治，遷延難愈，言語無倫，神不守舍，病似邪也，若以邪治，危亡可待，去血過多，而大便燥急，肉蓯蓉加於生化，非潤腸承氣之能通，去汗過多，而小便短澀，六君子倍加參者，必生津助液之可利，加參生化湯，頻服救產後之危，長生活命丹，屢用甦絕穀之人，癰疽脫肛，多是氣虛下陷，補中益氣之方，口噤拳攣，乃因血燥類風，加參生化之劑，產戶入風而痛甚，服宜羌活養榮湯，玉門傷涼而不閉，洗宜蟬兒黃疏散，怔忡驚悸生化湯，加以定志，似邪恍惚，安神丸助以歸脾，因氣而悶滿虛煩，生化湯加木香爲佐，因食而吞酸惡食，六君子加神麴麥芽爲良，蘇木莪朮，大能破血，青皮枳殼，最消滿脹，一應耗氣破血之劑，汗吐宣下之法，止可施諸壯實，豈宜用於胎產，大

抵新產後先問惡露如何，塊痛未除，不可遽加參朮，腹中痛止，補中益氣無疑，至若亡陽脫汗，氣虛喘促，頻服加參生化湯，是從權也，又如亡陰火熱，血崩厥暈，速煎生化原方，是急救也，王太僕云，治下補下，治以急緩，緩則道路達而力微，急則氣味厚而力重，故治產當遵丹溪而固本，服法宜效太僕以頻加，凡付生死之重寄，須著意於極危，欲求俯仰之無虧，用存心於愛物，此雖未盡產證之詳，然所聞一證，皆援近鄉治驗爲據，亦未必無小補云。

正產

正產者，有腹或痛或止，腰脇酸痛，或勢急而胞未破，名弄胎，服八珍湯加香附自安，有胞破數日，而痛尙緩，亦服上藥俟之。

傷產

傷產者，胎未足月，有所傷動或腹痛臍痛，或服催生藥太早，或產母努力太過，逼錯兒路，不能正產，故臨月必舉動從容，不可多睡飽食飲酒，但覺腹中動轉，卽正身仰臥，待兒順轉，與其臨時費力，不如先時慎重。

調產

調產者，產母臨月擇穩婆辦器用，備參藥，產時不可多人喧鬧，二人扶身，或憑

物站，必頻用滾水調白蜜一匙，獨活湯更妙，或飢服糜粥少許，勿令飢渴，有生息未順者，只說有雙胎，或胎衣不下，勿令產母驚恐。

催生

催生者，因坐草太早，困倦難產，用八珍湯，稍佐以香附乳香，以助血氣，胞衣早破，漿血已乾，亦用八珍湯。

凍產

凍產者，天寒血氣凝滯，不能速生，故衣裳宜厚，室宜煖，背心下體尤要。

熱產

熱產者，暑月宜溫涼得宜，若產室人衆，熱氣蒸逼，致頭痛面赤昏暈等證，宜飲清水少許以解之，然風雨陰涼，亦當避之。

橫產

橫產者，兒居母腹，頭上足下，產時則頭向下，產母若用力逼之，胎轉至半而橫，當令產母安然仰臥，令其自順，穩婆以中指挾其肩勿使臍帶羈絆，用催生藥，努力卽下，當歸 紫蘇各三錢長流水煎服卽下，一方用好京墨磨，服之卽下。一方用敗筆頭一個，火煨，以藕節自然汁調服之，卽下。

一方用益母草六兩濃煎，加童便一大杯，調服即下。

盤腸產

盤腸產者，產則子腸先出，然後生子，其腸或未即收，以葶麻子四十九粒，研碎塗頭上，腸收，急急洗去，遲則有害，又方止用四十粒，去皮研爲膏，塗頂中，收即拭之，如腸燥，以磨刀水潤之，再用磁石煎湯服之。

難產

難產者，交骨不開，不能生產也，服加味芎歸湯，良久即下，小川芎一兩當歸一兩敗龜板一兩酒炙婦人髮灰一握須用生過男女者爲末，水一鐘，煎七分服。

死產

死產者，子死腹中也，驗母舌青黑，其胎已死，先用平胃散一服，酒水各一鐘，煎八分，投朴硝煎服即下，用童便亦好，後用補劑調理。

下胞

胞衣不下，用滾酒送下，失笑散一劑，或益母丸，或生化湯，送鹿角灰一錢，或以產母髮入口作吐，胞衣即出，有氣虛不能送出者，腹必脹痛，單用生化湯，全當歸一兩川芎三錢白朮一錢香附一錢加人參三錢更妙，用水煎服。

一方用草麻子二兩，雄黃二錢，研膏塗足下湧泉穴，衣下，急速洗去。
平胃散

南蒼朮米泔水浸炒厚朴薑汁炒陳皮炙艸各二錢共爲粗末，或水煎，或酒煎，煎成時加朴硝一錢，再煎一二沸，溫服。
失笑散

五靈脂蒲黃俱研爲細末，每服三錢，熱酒下。

斷臍

斷臍必以棉裹咬斷爲妙，如遇天寒，或因難產，母子勞倦，宜以大麻油紙撚，徐徐燒斷，以助元氣，雖兒已死，令煖氣入臍，多得生，切勿以刀斷之。
滑胎散臨月常服數劑以便易生

當歸三五錢川芎五七錢杜仲二錢熟地三錢枳殼七分山藥二錢水二鐘，煎八分，食前溫服，如氣體虛弱人，加人參白朮，隨宜服之，如便實多滯者，加牛膝二錢。
治產秘驗良方

治橫生逆產，數日不下，一服即下，有未足月，忽然胎動，一服即安，或臨月先服一服，保護無虞，更能治胎死腹中，及小產傷胎無乳者，一服即如原體，全

當歸 川芎各一錢五分 川貝母一錢去心 荊芥穗 黃耆各八分 厚朴薑炒 蘼艾 紅花
各七分 兔絲子一錢二分 枳殼麵炒 羌活麵炒 各六分 白芍一錢二分 冬月不用 甘草五分
上十三味，只用十二味，不可加減，安胎去紅花，催生去蘼艾，用井水鍾半薑二
片爲引，熱服，渣用水一鍾煎半鍾，熱服，如不好，再用水一鍾，煎半鍾，服之
卽效，不用二劑。

催生兔腦丸 治橫生逆產神效

臘月兔腦髓一個 母丁香一個 乳香一錢另研 麝香一分 兔腦爲丸 芡實大，陰乾密封，
用時溫酒送下一丸。

奪命丹

臨產未產時，目反口噤，面黑唇青，口中吐沫，命在須臾，若臉面微紅，子死母
活，急用蛇退， 蚕故子燒灰不存性 髮灰一錢 乳香五分共爲細末，酒下。

加味芎歸湯 治子宮不收產門不開

人參二錢 黃耆一錢 當歸二錢 川芎一錢 升麻八分 炙草四分 五味子十五粒 再不收加半
夏八分 白芍八分 酒炒

新產治法

生化湯先連進二服，若胎前素弱婦人，見危證熱證墮胎，不可拘帖數服，至病退乃止，若產時勞甚，血崩形脫，即加人參三四錢，在內頻服無虞，若氣促亦加人參，加參於生化湯者，血塊無滯，不可以參爲補而弗用也，有治產不用當歸者，見偏之甚，此方處置萬全，必無一失，世以四物湯治產，地黃性寒滯血，芍藥微酸無補，伐傷生氣，誤甚。

產後用藥十誤

一因氣不舒而誤用耗氣順氣等藥，反增飽悶，陳皮用至五分，禁枳實厚朴。

二因傷氣而誤用消導，反損胃氣，至絕穀，禁枳壳大黃蓬棱麵朴。

三因身熱而誤用寒涼，必致損胃增熱，禁芩連梔柏升柴。

四因日內未曾服生化湯，勿用參耆朮以致塊痛不消。

五毋用地黃以滯惡露。

六毋獨用枳壳牛膝枳實以消塊。

七便秘毋庸大黃芒硝。

八毋用蘇朮棧蓬以行塊。芍藥能伐氣不可用。

九毋獨用山查湯以玫瑰定痛。而反損新血。

十母輕用濟坤丹。以下胎下胞。

產後危疾諸證。當頻服生化湯。隨證加減。照依方論。

產後寒熱

凡新產後營衛俱虛。易發寒熱。身痛腹痛。決不可妄投發散之劑。當用生化湯爲主。稍佐發散之藥。產後脾虛。易於停食。以致身熱。世人見有身熱。便以爲外感。遽然發汗。速亡甚矣。當於生化湯中。加扶脾消食之藥。大抵產後先宜補血。次補氣若偏補氣而專用參耆。非善也。產後補虛用參耆。歸白朮陳皮炙草。熱輕則用茯苓淡滲之藥。其熱自除。重則加乾姜。或云大熱而用姜何也。曰此熱非有餘之熱。乃陰虛內生熱耳。蓋乾姜能入肺分。利肺氣。又能入肝分。引衆藥生血。而必與陰血藥同用之。產後惡寒發熱腹痛者。當主惡血。若腹不痛。非惡血也。

產後寒熱。口眼歪斜。此乃氣血虛甚。以大補爲主。左手脉不足。補血藥多於補氣藥。右手脉不足。補氣藥多於補血藥。斷不可用小續命等發散之藥。

胎前患傷寒疫證瘧疾墮胎等證。

胎前或患傷寒疫證。瘧疾熱久。必致墮胎。墮後愈增熱。因熱消陰血。而又繼產

失血故也，治者甚勿妄論傷寒瘧疫未除，誤投梔子鼓湯，柴苓連柏等藥，雖或往來潮熱，大小便秘，五苓承氣等藥，斷不可用，只重產輕邪，大補氣血，頻服生化湯，如形脫氣脫，加生脉散以防血暈，蓋川芎味辛能散，乾姜能除虛火熱，雖有便秘煩渴等證，只多服生化湯，自津液生而二便通矣，若熱用寒劑，愈虛中氣，誤甚。

產後諸證治法

血塊第一

此證勿拘古方，妄用蘇木蓬稜，以輕人命，其一應散血方破血藥俱禁用，雖山查性緩，亦能有害，不可擅用，惟生化湯，係治血塊聖藥也。

生化湯原方

當歸八錢 川芎三錢 桃仁十四粒 去皮尖 研黑薑 炙草各五分 用黃酒童便，各半煎服。

又益母丸鹿角灰，就用生化湯送下一錢，外用烘熱衣服，煖和塊痛處，雖大暑亦要和煖塊痛處，有氣不運而暈迷厥，切不可妄說惡血搶心，只服生化湯爲妙，俗有生地牛膝行血、三稜蓬木敗血，山查沙糖消塊，蘗艾椒酒定痛，反致昏暈等證

，切不可妄用，二三四日內，覺痛減可揉，乃虛痛也，宜加參生化湯。

如七日內，或因寒涼食物結塊，痛甚者，加入肉桂八分，於生化湯內，如血塊未消，不可加參者，用之則痛不止，總之慎勿用峻利藥，勿多飲薑椒艾酒，頻服生化湯，行氣助血，外用熱衣以煖腹，加用紅花以行之，蘇木牛膝以攻之，則誤，其胎氣脹用烏藥香附以順之，枳壳厚朴以舒之，甚有青皮枳實蘇子，以下氣定喘，芩連梔子黃柏，以退熱除煩，至於血結更甚，反用承氣湯下之而愈結，汗多小便短濇，反用五苓散通之而愈秘，非徒無益，而又害之也。

凡兒生下，或停血不下，半月外尙痛，或外加腫，毒高寸許，或身熱，減飲食倦甚，必用生化湯加三稜蓬朮肉桂等，攻補兼治，其塊自消，如虛甚食少泄瀉，只服此帖定痛，且健脾胃，進食止瀉，然後服消塊湯。

加味生化湯治血塊日久不消半月後方可用之

川芎一錢 當歸三錢 黑薑四分 桃仁十五粒 三稜醋炒 元胡 肉桂各六分 炙草四分

血暈第二

分娩之後，眼見黑花，頭眩昏暈，不省人事者，一因勞倦甚而氣竭神昏，二因大脫血而氣欲絕，三因痰火乘虛泛上，而神不守，當急服生化湯二三帖，外用韭菜

細切，納有嘴瓶中，用滾醋二鐘，沖入瓶內，急沖產母鼻中即醒，如暈厥牙關緊閉，速煎生化湯，挖開口，將鷄毛探喉，酒盞盛而灌之，如灌下腹痛漸溫煖，不可拘帖數，外用熱手，在單衣上從心揉按至腹，常熱火煖之，一兩時，服生化湯四帖完，即神清，始少緩藥，方進粥，服至十服而安，故犯此者，速灌藥火煖，不可棄而不救，若在冬月，婦人身欠煖，亦有大害，臨產時必預煎生化湯，候兒下地，連服二三帖，又產婦枕邊行醋韭投醋瓶之法，決無暈証，又兒生時合家不可喜子而慢母，產母不可顧子忘倦，又不可產訖即臥，或忿怒逆氣，皆致血暈，慎之慎之。

加味生化湯治產後三等血暈證

川芎三錢 當歸六錢 黑薑四分 桃仁十粒 炙草五分 荊芥四分 炒黑大棗，水煎服，勞倦甚而暈，及血崩氣脫而暈，並宜速灌兩服，如形色脫，或汗出而脫，皆急服一帖，即加人參三四錢，一加肉桂四分，決不可疑參爲補而緩服，痰火乘虛泛上而暈，方內加橘紅四分，虛甚加人參二錢 肥人多痰，再入竹瀝七分 薑汁少許，總不可用稜朮破血等方，其血塊痛甚，兼送益母丸或鹿角灰，或元胡散，或獨勝散，上消血塊，方服一服即效，不必易方，從權救急。

加參生化湯治產後形色脫暈或汗多脫暈

人參三錢有倍加五錢者川芎二錢當歸五錢炙草四分桃仁十粒炮薑四分大棗水煎服，脈脫形脫，將絕之證，必服此方，加參四五錢，頻頻灌之，產後血崩血暈兼汗多，宜服此方，無汗不脫，只服本方，不必加參，左尺脈脫亦加參，此方治產後危急諸證可通用，一晝一夜，必須服三四劑，若照常證服，豈能接將絕之氣血，扶危急之變證耶，產後一二日血塊痛雖未止，產婦氣血虛脫，或暈或厥，或汗多，或形脫，口氣漸涼，煩渴不止，或氣喘急，無論塊痛，從權加用參生化湯，病勢稍退，又當減參，且服生化湯。

加減法，血塊痛甚，加肉桂七分，渴加麥冬一錢五味十粒，汗多加麻黃根一錢，如血塊不痛，加炙黃耆一錢以止汗，傷飲食麵食，加炒神麴一錢，麥芽五分炒，傷肉食，加山查五個，砂仁四錢炒。

厥證第三

婦人產後，用力過多，勞倦傷脾，故逆冷而氣厥上胸滿，脈去形脫，非大補不可，豈錢數川芎當歸，能回陽復神乎，必用加參生化湯，倍參進二劑，則氣血旺而神自生矣，厥自止矣，若服藥而反渴，另有生脈散，獨參代茶飲，救臟之燥，如

四肢逆冷，又泄痢類傷寒陰證，又難用四逆湯，必用倍參生化湯加附子一片，可以回陽止逆，又可以行參歸之力，立二方於左，分先後。

加參生化湯治產後發厥塊痛未止不可加者尤

川芎二錢 當歸四錢 人參二錢 炙草五分 炮薑四分 桃仁十粒 去皮尖研 棗水煎，進二服。

滋榮益氣復神湯治產後發厥問塊痛已除可服此方

人參三錢 黃耆一錢 蜜炙白朮一錢 土炒當歸三錢 炙草四分 陳皮四分 五味十粒 川芎麥芽 熟地各一錢 棗一枚，水煎服，手足冷，加附子五分，汗多加麻黃根一錢，熟棗仁一錢，妄言妄見，加益智柏子仁龍眼肉，大便實加肉從蓉二錢，大抵產後暈厥二證相類，但暈在臨盆，證急甚於厥，宜頻服生化湯幾帖，塊化血旺，神清暈止，若多氣促形脫等證，必加參耆，厥在分娩之後，宜倍參生化湯，止厥以復神，並補氣血也，非如上偏補氣血而可愈也，要知暈有塊痛，耆朮不可加，厥證若無塊痛，耆朮地黃並用無疑也。

血崩 第四

產後血大來，審血色之紅紫，視形色之虛實，如血紫有塊，乃當去其敗血也，止

留作痛不可論崩，如鮮紅之血乃是驚傷心，不能生血，怒傷肝不能藏血，勞傷脾不能統血，俱不能歸經耳，當以崩治，先服生化湯幾帖，則行中自有補，若形脫汗多氣促，宜服倍參生化湯幾帖以益氣，非棕灰之可止者，如產後半月外崩，又宜升舉大補湯治之，此證虛極，服藥平穩，未見速效，須二十帖後，諸證頓除。生血止崩湯治產後血崩

川芎一錢 當歸四錢 黑薑四分 炙草五分 桃仁十粒 荊芥五分 炒黑烏梅五分 煨灰蒲黃五分 炒棗水服，忌薑椒熱物生冷，鮮紅血大來，荊芥穗炒黑白芷各五分，血竭形敗，加參三四錢，汗多氣促，亦加參三四錢，無汗形不脫氣促，則服生化湯，多服則血自平，有言歸芎但能活血，甚誤。

升舉大補湯滋榮益氣如有塊動只服前方者龍勿用

黃耆 白朮 陳皮各四分 人參二錢 炙草四分 當歸 熟地各二錢 升麻四分 麥冬 川母各一錢 白芷四分 黃連三分 炒荊芥穗四分 炒黑汗多加麻黃根一錢，浮麥炒一小撮，大便不通，加肉從容一錢，用大黃，有氣磨木香三分，痰加貝母六分，竹瀝薑汁少許，寒嗽加杏仁十粒 桔梗五分 知母一錢，驚加棗仁 柏子仁各一錢，傷飯加神曲 麥芽各一錢，傷肉食加山查 砂仁各八分，俱加棗水煎，身熱不可加連柏，傷

食怒氣，均不可專用耗散無補藥，凡年老虛人患崩，宜升舉大補湯。

氣短似喘第五

因血脫勞甚，氣無所恃，呼吸止息，違其常度，有認為痰火，反用散氣化痰之方，誤人性命，當以大補血為主，如有塊不可用參耑朮，無塊方可，用本方去桃仁加熟地并附子一片，足冷加熟附子一錢及參朮陳皮，接續補氣養榮湯。

加參生化湯治分娩下即患氣短者有塊不可加耑朮

川芎二錢當歸四錢炙草五分黑薑四分人參二錢桃仁十粒去皮尖研引加棗一枚，連進二三帖後，再用後方

補氣養榮湯治產後氣短促血塊不痛宜服此方

黃耑 白朮各一錢當歸四錢人參三錢陳皮 炙草各四分熟地 川芎各二錢黑薑四分如手足冷加熟附子一錢，汗多加麻黃根一錢浮麥一小撮，渴甚麥冬一錢五味子十粒，大便不通，加肉從蓉一錢麻仁一撮，傷麵飯錢炒神麴一錢炒麥芽一錢，傷肉食加山查砂仁各五分，按麥芽有回乳之害，用者慎之。

妄言妄見第六

由氣血虛，精神無依也，治當問塊痛有無緩急，若塊痛未除，先服生化湯二三帖

，痛止繼服加參生化湯，或補中益氣湯，加安神定志丸湯丸調服之，若產日久，形氣俱不足，即當大補氣血，安神定志，服至藥力充足，其病自愈，勿謂邪祟，若迷信方法驚之，每至不救，屢治此證，服藥至十數帖方效，病虛似邪，欲除其邪，先補其虛，先調其氣，次論諸病，此古人治產後虛證，及年老虛喘弱人妄言，所當用心也。

安神生化湯治產後塊痛未止妄言妄見證未可用者

川芎二錢 柏子仁一錢 當歸二三錢 人參一二錢 茯神二錢 桃仁十二粒 黑薑 炙草各四分 益智八分 炒陳皮三分 棗水煎服。

滋榮養氣復神湯塊痛已止妄言妄見服此方即愈

黃耆 白朮 麥冬 川芎 柏子仁 茯神 益智各一錢 人參 熟地各二錢 陳皮三分 炙草四分 棗仁十粒 一錢 五味子十粒 蓮子八枚 桂圓肉八個 棗水煎服，產後血崩血脫，氣喘氣脫神脫，妄言雖有血氣陰陽之別，其精神散去一也，比暈後少緩，亦急證也，若非厚藥頻服，夫之者多也，誤論氣實痰火者非也，新產有血塊痛，並用加參生化湯，行中有補，斯免滯血，血暈之失也，其塊痛止宜用升舉大補湯，少佐黃連墜火以治血脫，安血歸經也，宜用倍參補中益氣湯，少佐附子助參，

以治氣脫，攝氣歸淵也，宜用滋榮益氣復神湯，少佐痰劑以清心火，安君主官之也。

傷食第七

新產後禁膏粱，遠厚味，如飲食不節，必傷脾胃，治當扶元，溫補氣血，健脾胃，審傷何物，再以消導諸藥，生化湯加神麴麥芽，以消麪食，加山查砂仁以消肉食，如寒冷之物，加吳萸肉桂，如產母虛甚，加人參白朮，又有塊然後消補並治，無有不安者，屢見治者不重產後之弱，惟知速消傷物，反損真氣，益增滿悶，可不慎哉。

加味生化湯治血塊未消服此以消食

川芎二錢 當歸五錢 黑薑四分 炙草五分 桃仁十粒 問傷何物，加法如前煎服。

健脾消食生化湯治血塊已除服此消食

川芎一錢 當歸 人參各二錢 白朮一錢半 炙草五分 審傷何物，加法如前，如停寒物日久，脾胃虛弱，恐藥不能運用，可用揉按，麪熨之更妙，凡傷食誤用消導藥，反絕粥幾日者，宜服此方。
長生活命丹

人參三錢，水一鍾半煎半鍾，先用參煎鍋焦粉，引開胃口，煎參須用新罐或如姜三大片煎之，人參名活命草，鍋焦石

忿怒第八

產後怒氣逆胸膈不利，血塊又痛，宜用塊化怒散，不相悖也，若輕產重氣，益增滿悶，又有怒後即食，胃弱停悶，流氣引子之方，使虛弱愈甚也。

木香生化湯治產後血塊已除因受氣者川芎二錢當歸六錢陳皮三分黑薑四分如皮，前有減乾姜者詳之。

健脾化食散氣湯治受氣傷食無塊痛者白朮當歸各二錢川芎一錢黑薑四分一抵產後忿怒氣逆，及停食等證，善治以調肝順氣，則怒鬱散而元不損，佐以

消食，非徒無益，而又害之。

類瘧第九

產後寒熱往來，每日應期而發，其證似瘧，而不可作瘧治，夫氣血虛而寒熱更作，元氣虛而外邪或侵，或嚴寒，或極熱，或晝輕夜重，或日晡寒熱，絕類瘧證，治當滋榮益氣，以退寒熱，有汗急宜止，或加麻黃根之類，只頭有汗而不及於足，乃孤陽絕陰之危證，當加地黃當歸之類，如陽明無惡寒，頭痛無汗，且與生化湯，加羌活防風連鬚葱白數根以散之，其柴胡清肝飲等方，常山草果等藥，俱不可用。

滋榮養氣扶正湯治產後寒熱有汗午後應期發者

炙黃耆 白朮 川芎 熟地 麥冬 麻黃根各一錢 人參二錢 當歸三錢 陳皮四分 炙

草五分 棗水煎。

加減養胃湯治產後寒熱往來頭痛無汗類瘧者

炙草四分 白茯苓一錢 半夏八分 製川芎一錢 陳皮四分 當歸二三錢 蒼朮一錢 藿香一分 人參一錢 姜引煎服，有痰加竹瀝姜汁半夏神麴，弱人兼服河車丸，凡久病不愈，兼服參朮膏，以助藥力。

參朮膏

白朮一斤米湯浸一宿剉焙 人參一兩用水六碗，煎二碗，再煎二次，共計六碗，合在一處，將藥汁又熬成一碗，空心米湯化半酒盞。

類傷寒二陽證第十

產後七日內發熱，頭痛惡寒，毋專論傷寒爲太陽證，發熱頭痛脇痛，毋專論傷寒爲少陽證，二證皆由氣血兩虛，陰陽不和而類外感，治者慎勿輕產後熱門，而用麻黃湯以治類太陽證，又勿用柴胡以治類少陽證，且產母脫血之後，而重發其汗，虛虛之禍，可勝言哉，昔仲景云亡血家不可發汗，丹溪云產後切不可發表，二先生非謂產後真無傷寒之兼證也，非謂麻黃湯柴胡湯之不可對證也，誠恐後輩學業偏門而輕產，執成方而發表耳，請知產後真感風感寒，生化中芎姜亦能散之乎。

加味生化湯治產後三日內發熱頭痛證

川芎 防風各一錢 當歸三錢 炙草四分 桃仁十粒 羌活四分 查刊本去桃仁，然必須間有塊痛與否，方可議去，服二帖後，頭仍痛身仍熱，加白芷八分細辛四分，如發熱不退，頭痛如故，加連鬚葱五個，人參三錢，產後敗血不散，亦能作寒作熱，

何以辨之，曰時有刺痛者敗血也，但寒熱無他證者，陰陽不和也，刺痛用當歸，乃和血之藥，若乃積血而刺痛者，宜用紅花桃仁歸尾之類。

類傷寒三陰證第十一

潮熱有汗，大便不通，毋專論爲陽明證，口燥咽乾而渴，毋專論爲少陰證，腹滿液乾，大便實，毋專論爲太陰證，又汗出譫語便閉，毋專論爲腸胃中燥，糞宜下證，數證多由勞倦傷脾，運化稽遲，氣血枯槁，腸腑燥涸，乃虛證類，實當補之證，治者勿執偏門輕產，而妄議三承氣湯，以治類三陰之證也，間有少壯產後妄下，幸而無妨，虛弱產婦，亦復妄下，多致不救，屢見妄下成臍，誤導反結，又有血少數日不通而即下，致瀉不止者，危哉婦人，良方云，產後大便秘若計其日期，飯食數多，即用藥通之，禍在反掌，必待腹滿覺脹，欲去不能者，反結在直腸，宜用豬肝汁潤之，若日期雖久，飲食如常，腹中如故，只用補劑而已，若服苦寒疏通，反傷中氣，通而不止，或成痞滿，誤矣。

(卷三終)